

欽  
定  
全  
唐  
文

欽定全唐文卷六十四目錄

穆宗一

貶皇甫鎛崖州司戶制

授蕭俛中書侍郎平章事制

貶李景儉建州刺史制

授崔植平章事制

授蕭俛門下侍郎平章事制

授李光顏同平章事制

宣慰鎮州制

蕭俛守尚書右僕射制

授杜元穎平章事制

封諸王制

定淮蔡山東稅額制

令勘會京畿職田制

加裴度司空制

御宣政殿試制科舉人制

處分賢良方正等科舉人制

授龐嚴等左右拾遺姚中立等校書正字等官制

授李絳吏部尚書蕭俛兵部尚書制

崔植刑部尚書制

授元稹平章事制

授裴度平章事制

裴度守尚書右僕射制

授李逢吉同平章事制

命元稹守同州刺史充本州防禦長春宮使制

授李源左諫議大夫制

復授韓宏中書令制

立景王爲皇太子制

授牛僧孺平章事制

委諸軍錄事參軍勾當義倉制

授費冠卿右拾遺制

欽定全唐文卷六十四

穆宗皇帝

帝諱恒憲宗第三子貞元十一年生初名宥封建安郡王元和元年八月進封遂王七年十月立爲皇太子改今名十五年正月即位長慶元年七月上尊號曰文武孝德皇帝在位四年年三十諡曰睿聖文惠孝皇帝廟號穆宗

貶皇甫鏞崖州司戶制

朕顧眇身初膺大寶思有以上諧天意下悅人心將澄理化之源必分邪正之路言念輔弼方俟忠賢其或挾姦容

身斂怨歸國罪已暴於天下法宜行於事初不速去之曷  
明予志中大夫守門下侍郎同中書門下平章事上柱國  
賜紫金魚袋皇甫鎛器本凡近性惟險狹行靡所顧文無  
可觀雖早踐朝倫而素乖分望自掌邦計屬當軍興以剝  
下爲徇公旣鼓衆怒以矯節爲孤立用塞人言洎塵台司  
益蠹時政不知經國之大體不慮安邊之遠圖三軍多凍  
餒之憂百姓深凋瘵之弊事皆罔蔽言悉虛誣遠近咸知  
朝野同怨而又廣稱方士上惑先朝潛通姦人罪在難赦  
合加竄殛以正刑章俾黜遐荒尚存寬典凡百在位宜悉

朕懷

授蕭俛中書侍郎平章事制

廊廟之任萬邦所瞻調一氣之和序五材之用出納王命  
發揮帝猷簡求賢能宏我理本朝議郎守御史中丞飛騎  
尉襲徐國公賜緋衣魚袋蕭俛識通化源道契休運有戴  
君峻節之志秉見義匪躬之誠代襲公台族高軒冕學冠  
古今之要詞深雅誥之宗嘗事先朝職居宥密奏議無撓  
忠勞益彰洎執憲南臺肅清朝序休望彌洽直聲日聞朕  
方臨萬邦思致於理若涉大水浩無津涯將務簡以安人

欲息兵而論道審象以授其代予勤爾其端志絕私去末  
崇本敘禮樂於邦國正風教於人倫舉其鈞衡明示天下  
無俾一德專美於殷爾其敬之奉我成命可朝散大夫守  
中書侍郎平章事仍賜紫金魚袋

貶李景儉建州刺史制

夫士之出處則辨其邪正人之踐修宜勵其終始苟不容  
於公論誠難追於國章況其擢自宗枝常探儒術游歷臺  
閣亦分郡符而動或違仁行不繇義附權倖以虧節通奸  
黨之陰謀衆情皆疑羣議難息據因緣之狀當寘嚴科順

長養之時特從寬典免於省過無或徇非可建州刺史

授崔植平章事制

夫宰相者上調元化以亮天工下熙庶績以輔君德未有  
心不直而能協於道迹不正而能致其君必求斯人乃命  
以位朝議郎守御史中丞武騎尉賜紫金魚袋崔植氣志  
凝遠風標粹清率性而行潔己以進周歷臺閣藹然聲猷  
頃者姦臣未除利權方擅情惟刻下其事將行而植獨能  
橫抗申以駁議朕每嘉重不忘於懷自膺寶圖俾掌邦憲  
又能悉心秉執造膝敷陳歸於無私多所宏益爰擢作相

冀能弼予於戲惟爾先太傅當德宗始初清明首居相位克固直道至於今稱之爾其嗣乃家法無廢朕命可朝散大夫守中書侍郎平章事

授蕭俛門下侍郎平章事制

門下天生蒸民樹之司牧非輔弼不能宣其教化非忠賢無以廣其謀猷其履道居貞開物成務才旣彰於人望績方著於國均是宜表式周行歷踐樞禁朝議大夫守中書侍郎平章事蕭俛器懷沈正風度夷遠識蘊通人之量文爲君子之儒守道易知臨事難奪內庭推謹密之效司憲

宏端肅之規所以仗其公忠寄之啟沃嘉乃匡益副子簡  
求思序德以任賢冀資忠而致理俾光帷幄再踐台階無  
替前勞往服休命於戲秉一心者時惟良弼宰萬物者是  
資化源后德惟臣予既虚心而納誨國家在相爾宜勵節  
以致誠無媿知人式佇明效可門下侍郎平章事

授李光顏同平章事制

寰宇已清而兵不可失干戈載戢而功不可忘爰升經武  
之材用輔同文之理具瞻此允注意尤深蓋以獎舊勞而  
申賞典也李光顏稟忠厚仁信之資服禮樂詩書之訓沈

勇而決剛嚴不殘挺長劍之鋒稜蓄殷雷之氣象以忘身  
徇節爲任以約己率衆爲心屬先帝撫運動人墾菑除害  
能展七擒之略以成四克之功方夏甫寧凱旋未幾驅仍  
歲陷堅之士爲盛秋乘障之師果逐奔戎載完危壁西絕  
夷落威名赫然念茲勲庸當極寄任是以徵自堡塞接於  
明庭亟聞宏遠之規復挹沖深之度固可以內參鈞軸外  
總麾旗憲彼萬邦叶予一德可不勉歟可檢校司空同中  
書門下平章事依前邠州節度等使

宣慰鎮州制

朕聞帝王丕宅四海子育羣生如天無不覆如日無不燭其發號施令也如風其行慶布惠也如雨故能上符天道下感人心朕自嗣守寶圖將欲恢宏王略常懼化有所未至恩有所不周乃瞻冀方初喪戎帥念乎三軍之士洎於四州之人或懷忠積誠而思用莫展或災荒兵役而望恤何啻今則昌運一開誠節咸著王承元首陳章䟽願赴闕廷思保父兄之名克固君臣之義已加殊獎別委重藩又念成德軍將士等叶心嚮義丹款載申方欲効其器能各宜列於爵秩大將史重歸牛元翼等已並超授榮寵今復

都加厚賜普示深恩兼以四州貧下百姓當敷賑贍之惠  
俾識含育之仁宜令諫議大夫鄭覃往鎮州宣慰親諭朕  
意仍共賜賞錢一百萬貫以內庫及戶部見在匹段支送  
充賞給將士兼貸四州貧下差科州縣之中或有殘破頗  
甚者委田宏正量便宜優卹務令存濟朕又以王澤所洽  
天網方恢宥過釋冤與人休泰其管內繫禁囚徒罪無輕  
重並宜赦免其大將等雖已頒賜官爵或慮有遺并判官  
等宜委宏正具名銜聞奏如或父母在者別具上聞當加  
優卹當道從前已來官吏將校等或忠義可嘉而刑戮濫

及如有此色亦條錄奏聞當加追贈如子孫見在者厚加  
優卹仍具聞奏四州之內有高年悃獨或承平遺老咸覩  
皇風或孤獨廢疾不能自存者差官就問量給粟帛四州  
之內有奉職清勤惠及百姓者具事跡聞奏當量加進改  
如有隱居山谷退在邱園行義素高名節可尚或才兼文  
武卓然可獎者具名薦聞朕以武俊之勲勞光於彝鼎士  
真之恭恪繼被節旄承宗感恩亦克立効永言十代之宥  
俾賜一門之榮承宗兄弟並已授官爵如或未盡霑及亦  
當具名聞奏其承宗葬事亦差官勾當禮物之閒務令周

金史卷之三十一 三十一  
厚嗚呼錄其遺忠延乎後嗣旌其衆善被於一方國有羨  
財不吝於卹隱朝有好爵無愛於賞功庶使八表大同五  
兵永戢宣示中外宜體朕懷

蕭俛守尚書右僕射制

師長庶工總詳六職重任久曠益難其人自非體參股肱  
位列鈞鼎引義以知退致禮而加恩則授受之閒何以允  
茲任也朝議大夫守門下侍郎同平章事襲徐國公賜紫  
金魚袋蕭俛門承華袞位列清貫用能周物志在佐時勤  
內署之論思肅南臺之綱紀朕初承天序擢處台階推一

心獻納之誠贊四方經營之績及此踰歲累陳懇詞微恙所侵堅請難奪朕憂勤庶政親委大臣務厚始終以全進退既謝弼諧之任宜加端揆之崇爾宜戒之服我優秩可守尚書右僕射勲賜如故

授杜元穎平章事制

王者昭宣令德臨視百官必有台臣總其方略況是先朝正姦邪之罪型海內之心既承大勲付朕鴻業思欲述事繼志偃武修文揚其耿光屬在髦傑朝散大夫守尚書戶部侍郎知制誥翰林學士上柱國建安縣開國男食邑三

百戶賜紫金魚袋杜元穎識稟人秀才爲國華器縝密以  
含章言清明而體要廉方不雜峻直無徒洞朗鑒而心運  
陽秋鼓雄詞而氣幹河嶽爰以精粹列於內廷通賈生理  
亂之言達管氏刑政之本未至高位蔚爲名臣閒者妖孽  
相挺紛亂南北朝夕機命迅如風霆而翰動若飛神無滯  
用思戰必盡其心力避榮常執其謙光況虔奉綴衣導揚  
訓命雅仗忠貞之志實有安定之功本於忘身愛我以德  
感激無隱切劘盡規既納誨於三篇亦陳戒於六事朕嘗  
委以大政詢其遠猷研幾必精應變常理布舊章於河朔

推大信於昆夷無所不諧實由密贊令器焜耀淑聲流聞  
升於台階允是瞻望於戲昔爾先正爲唐宰衡惟爾傳臧  
孫有後之慶秉召公是似之德宜纂舊服協於至公乃思  
貽厥之謀率攸行之道扼制羣動衡平衆流俾人不迷時  
乃之績可守尚書戶部侍郎平章事散官勲並如故

封諸王制

門下朕獲承天序欽若前訓用建藩輔以明親賢斯古先  
哲王之令典也弟憬等孝友寬厚溫文肅敬行有枝葉道  
無緇磷踐君子之中庸究賢人之義理情惟樂善志不近

名慕閒平之令德希曾閔之至行宜分建茅土衛我邦家  
叶於展親永固磐石是用舉其成命錫以徽章第八弟憬  
可封鄜王第九弟悅可封瓊王第十弟恂可封沔王第十  
一弟懌可封婺王第十二弟愔可封茂王第十三弟怡可  
封光王第十四弟協可封淄王第十五弟憺可封衡王第  
十六弟忱可封澶王長男湛可封景王第二男涵可封江  
王第五男灑可封潁王宜令有司擇日備禮冊命主者施  
行

定淮蔡山東稅額制

愛人本於省賦雖必在輕國用出於地財又安可闕今淮  
蔡並山東率三十餘州約數千里頒賜可踰於鉅萬給復  
有至於連年應河南河北等州給復限滿處置宜委所在  
長吏審詳墾田并桑見定數均輸稅賦兼濟公私每定稅  
訖具所增加賦申奏其諸道定戶宜委觀察使刺史必加  
審實務使均平京兆府亦宜準此

令勘會京畿職田制

百司職田在京畿諸縣者訪聞本地多被所繇侵隱抑令  
貧戶佃食蒿荒百姓流亡半在於此宜委京兆府勘會均

配務使公平

加裴度司空制

懷大忠者必成其茂勲建茂勲者必極其高秩朕虔守鴻業靜思化源固欲表忠節以勵爲臣舉勲籍以勸立志況乎位崇上相遇重先朝首陳宏圖躬率羣帥克定妖孽坐清寰瀛得不再申褒崇昭示倚注河東節度觀察處置等使金紫光祿大夫檢校尚書左僕射兼門下侍郎同中書門下平章事大原尹北都留守上柱國晉國公食邑三千戶裴度材膺啟運道協功借一心盡忠百志歸正雖量包

宏曠靡所不容而節抱孤貞凜然難奪所以特承恩顧專  
委謀猷堅持其誠獨立不懼在昔有晉厥功平吳惟茂先  
決策於中惟元凱整旅於外兼能並用度實有之許國忘  
身勤亦至矣自居重任出入六年及鎮太原聲績一貫朕  
永懷丕烈乃睠舊臣將副深衷式加新命惟正三公之位  
在乎九土之司論道再光總戎益重毗我王室永孚於休  
可守司空依前兼門下侍郎平章事

御宣政殿試制科舉人制

古人有言嘗引一代之人以理一代之務雖雋賢茂彥不

乏於時然亦在敷納以言精覈其實若決川瀆以導其氣  
考金石以求其音使抱忠義者必盡其誠知古今者必先  
其慮朕纂承鴻業以撫兆人嘗欲效三代之禮修烈祖之  
法猶念和氣之未洽休祥之未臻百姓之未安五兵之未  
戢故詳延修潔之士庶得聞乎未聞將以達天地之心究  
俗化之變研安危之慮探理亂之言子大夫覃思於六經  
馳驚於百氏得不講求至論以沃朕心方直者舉朕之闕  
政術者體時之要慕元遠者卑其論瞻文詞者抑其華言  
經者折衷於聖人以明教化論將者先之以仁誼無效縱

橫於戲子大夫當朕之時必思自達且古之翼戴其君者尚委輅納說荷擔吐奇由壺關之上言自南昌而諷刺況文陛之下負展親臨若藏器不耀結囊而去顧朕深志復何望焉當體予衷無懼後害宜坐食訖就試

處分賢良方正等科舉人制

朕自郊上元御端門發大號與天下更始思得賢雋標明四科令羣公卿士暨守土之臣詳延下位周於草澤成列待問副予虛求昧爽臨軒俾究其論正辭良術精義宏謀繹之旬時深見忠益言刈其楚列而第之賢良方正能直

言極諫第三人龐巖第三次等人呂術第四等人韋曙  
姚中立李躔第四次等人崔嘏崔龜從任畹第五上等人  
韋正貫崔知白陳元錫博通墳典達於教化第四等人李  
思元詳明政術可以理人第四次等人崔郢軍謀宏遠堪  
任將帥第三人吳思第五等人李商卿咸以懿學茂識  
揚於明廷況當短晷之辰頗著論思之美粲然高論深沃  
朕心永言藏器之規豈忘繫駒之義寵之命秩允答嘉猷  
其第三等人第三次等人委中書門下優與處分其第四  
等人第四次等人第五上等人中書門下即與處分

授龐巖等左右拾遺姚中立等校書正字等官制  
昔仲尼之門以四科品第諸生所得十哲今吾徵四海九州之士可登名者十有五人搜羅簡拔非不勤至以今況古可謂才難是用詔爵以嘉獎其忠超擢以光明其道俾巖石之下人思自奮晁董之盛遠以爲隣延登諫垣式佇忠益讎書結綬皆曰顯途循其秩次亦示科等服我休命勗哉遠猷可依前件

授李絳吏部尚書蕭俛兵部尚書制

絳俛皆本朝先後之名相也而吏司爲劇俛固以疾辭兵

務差閒絳處之餘裕各令總理庶謂得宜

崔植刑部尚書制

宰相者朕之腹心和合天下在乎鎮靖藩服附親遠方將宏遂物之宜必有更張之道正議大夫守中書侍郎同中書門下平章事武騎尉賜紫金魚袋崔植往在先朝頗推廉直馴行惟謹保萬石之風清德不渝紹四公之業遂昇左掖實著能名駁正之美稱於朝列朕以孝公太傅代載忠貞擢於相門授以台席顧惟寡昧奉若丕圖每念爲君之難敢忘從諫之義推誠聽納虛已咨詢庶洽羣心以迎

和氣叔教是期於秉羽汲黯謂致於寢謀宵分以興日旰  
忘食昔藩國多事平津讓侯陰陽未和石慶辭位惟爾謙  
遜豈嘗求安稱疾拜章勤亦至矣雖愒日之年未及而寢  
冰之意尚堅遂輟樞機用成美志崇以大秩長於秋官君  
臣之間朕無所愧可刑部尚書散官勲賜如故

授元稹平章事制

朕聞御大器者登俊賢以爲輔弼敷大化者擢公忠以施  
政教故能成天下之務達天下之情俾三光宣明百度貞  
正我之倚注方得其人天實賚予允副僉望中散大夫守

尚書工部侍郎元稹珪璋茂器鸞鳳貞姿文涵六義之微  
學探百氏之奧剛而有斷忠不近名勁氣嘗勵於風霜敏  
識頗知於今古自恪居朝序休問再揚不自飾以取容不  
苟安而回慮處直忘屈在屯若夷卓然懷陶鑄之心豁爾  
見江湖之量閒者司文禁署主朕樞機每因事以立言累  
披誠而獻計心惟體國義乃忘身深陳濟物之才雅見經  
邦之志朕思宏理本用洽生靈式資康濟之材以暢和平  
之化於戲爾率於正則不正者知慎爾進於善則不善者  
必悛惟直道可以事君惟至公可以格物具茲數德毗予

一人永孚於休以底於道可守尚書工部侍郎同中書門下平章事散官勲封賜如故

授裴度平章事制

涉大川者操巨艦不畏於洪波構廣厦者揭宏材乃安於棟宇朕祇奉神器尊臨萬邦思弼諧輔相之臣致易簡雍熙之業爰擇舊德委之樞衡冀宏嘉猷以闡元化淮南節度副大使知節度事管内營田觀察等使光祿大夫守司空同中書門下平章事兼揚州大都督府長史上柱國晉國公食邑三千戶裴度氣稟宏廓材優康濟達識高議堅

明不渝儀型可以光巖廊度量可以方海嶽操握政柄張  
弛化權彝倫典謨合若符契昔我先聖以武略深計中樞  
密勿委之廟堂四海咸理朕仄席虛己勞懷宵旰禮命元  
老聞斯格言衷懷洞然雲霧皆豁是用輟撫淮南舉之台  
袞換其戎律列自黃扉秩崇上公望積師長寄爾以周召  
待爾以蕭曹任爾以埏埴授爾以鈞衡於戲衽席樽俎之  
內堂室牖戶之間無俟規臨可以觀察違爾宴息期爾折  
衝庶乎陰陽協和品物昭泰惟言是納爾舉必從使益稷  
臯陶爾無慚德垂衣南面我獲任賢無易斯言式遵明命

可守司空兼門下侍郎同平章事散官勳封如故

裴度守尚書右僕射制

朕端已推誠資於輔相求人與衆諒在訏謨所以徇公卿  
之言從庶士之望輟任淮海俾居台階舉先朝勳舊之臣  
當四海具瞻之位推心委柄期在賢能誠效靡孚余將安  
望光祿大夫守司空兼門下侍郎同中書門下平章事上  
柱國晉國公食邑三千戶裴度器本端誠道惟審諤挺松  
筠之操蘊珪玉之姿望積巖廊功書竹帛策勲報爵寵極  
人臣朕恭守睿圖推心輔弼聿求雋彥思致雍熙擢升論

道之司再授樞衡之任虛心有日佇乃嘉猷而鼎鼐未調  
弛張異制誠宜有犯無隱忠讜必陳使余誠懷不惑聞聽  
何苟容於造次致有閒於笙簧棘木旣窮匪辭焉驗昔漢  
以陰陽不和冊免丞相今訐謨或爽宜罷台司疇勲績以  
尚功錄忠勞而念舊俾居右揆非謂左遷用崇師長之榮  
勿以優閒自薄可守尚書右僕射散官勲封如故

授李逢吉同平章事制

門下朕聞天地洪鑪鼓之者橐籥帝王大業成之者股肱  
故堯舜垂衣禹湯恭己宏道任德惟予輔臣則八表清寧

萬邦咸乂故伊尹之舉臯陶之外庶績其凝不仁自遠正  
議大夫守兵部尚書輕車都尉賜紫金魚袋李逢吉大方  
比量中正持心貞玉無瑕精金匪礪峻節而高山是仰推  
誠而止水可觀剛柔所持吐茹無易往以青宮齒學導我  
典墳儀刑式孚蘭茝馨茂洎升台席翊奉先朝訐謨密聞  
獻替潛達外順明德中探至言溫恭聿修終始一貫朕嗣  
守丕業思得賢良將俟和羹期於舊老易之襄漢居以南  
宮每詢嘉言啟沃惟允今授之相印委以樞衡代天之工  
爾在專任於戲發號施令選賢任能申於百辟之上行於

四海之內朝無黨比人絕澆浮白黑粲然淄澠不溷使巖  
廊重位揚我清風宏宣大猷以暢王度可守門下侍郎同  
中書門下平章事散官勲如故主者施行

命元稹守同州刺史充本州防禦長春宮使制

宰相者位列巖廊權參造化內操政柄上代天工朕嗣守  
丕圖思興至理每於擢用冀獲雋良爲善有聞必資獎寵  
惟於憊謗用罷台階通議大夫守尚書工部侍郎同中書  
門下平章事上柱國賜紫金魚袋元稹遊藝資身明經筮  
仕累應科選益振芳華茂識宏才登名晁董之列佳辭麗

句馳聲鮑謝之間頃在憲臺嘗推舉職比及遷黜亦以直  
聞是用擢以周行典斯誥命洎參密近旋委台衡宜竭謀  
猷盡於毗贊而乃不思宏益之道遂嬰詿誤之嫌察以中  
情雖非爲已行茲左道豈曰效忠體涉異端理宜借黜朕  
以君臣之分貴獲始終任使之時亦聞獻懇每思加膝寧  
忍墜泉猶宏在宥之心俾列專城之寄左郡之大三輔推  
雄控壓關河連屬宮苑勉於政績副我恩私可使持節同  
州諸軍事守同州刺史充本州防禦長春宮等使散官勲  
賜如故

授李源左諫議大夫制

禮著死綏傳稱握節捐生守位取重人倫爲義甚明其風  
或替言念於此慨然興懷而朝之公卿有上言者稱天寶  
之季盜起幽陵振蕩生靈噬吞河洛贈司徒忠烈公愷處  
難居首正色受屠兩河聞風再固危壁首立殊節到今稱  
之其子源有曾閔之行可貫於神明有巢由之風可希於  
太古山林以寄其跡爵祿不入於心泊然無營五十餘載  
夫褒忠可以勸臣節旌孝可以激人倫尚義可以鎮澆浮  
敬老可以厚風俗舉茲四者大做於時是用擢自衡門立

於丹陛處以諫職冀聞讜言仍加印紱式示光寵可守左  
諫議大夫賜緋魚袋仍勅河南尹差官就所居敦諭遣發  
復授韓宏中書令制

帝王之理天下也外有方岳所以宣教化內立宰輔所以  
秉樞衡授任之重莫踰人臣之位斯極至於出分垣輸入  
作股肱非聞望尊高功庸顯赫則何以允膺僉屬光贊謀  
猷前忠晉絳隰等州節度觀察處置使開府儀同三司守  
司徒兼中書令河中尹上柱國許國公食邑三千戶韓宏  
德器寬宏識度邁遠才資英特學茂韜鈴持蕭何畫一之

心有杜晦立斷之利頃以關河右地藩屏近郊爰輟台臣  
仗茲戎節以清靜廉平之理牧我黎元通明簡正之方撫  
我師旅奸盜自息欺詐不生晨無飲羊夜無驚犬五郡富  
庶已飽仁惠之風三軍訓齊既習嚴明之令寧資借寇是  
用徵黃今選日來朝乘軒即路宜先極拜光我元臣上宰  
關三公崇秩俾復乃位惟其敬之可守司徒兼中書令散  
官勲封如故

立景王爲皇太子制

朕聞王者敬承宗祧欽若天命必建元子用寧邦家所以

光協繼明嚴當主鬯朕纘承聖緒寅奉丕圖永惟國本之  
安爰在皇儲之重而青宮久曠望苑未開何以表式元良  
昭宣鴻業稽於往冊用舉彝章長男景王湛孝愛恭和忠  
敬誠肅慈惠特稟寬仁夙彰言通典謨動協儀矩睦友宗  
屬遵承傳道克修令問日茂嘉猷宜踐儲闈以承庥命朕  
以君尊父嚴每推乾道聞詩學禮用首人倫嘉翼翼於誠  
心覩烝烝於孝敬克稱知子無讓前修俾奉粢盛式昭元  
嗣宜冊爲皇太子仍令有司擇日備禮冊命主者施行

授牛僧孺平章事制

舟楫所以濟大川棟梁所以成大廈舟具而湍波不竦材  
具而廊廟用崇朕若涉之心浩然增畏垂衣端拱期在股  
肱是用擢彼英髦付以衡石朝議郎守尚書戶部侍郎上  
柱國賜紫金魚袋牛僧孺方直秉心誠敬由己玉潔持操  
松貞表姿文著經邦業推匡代中立不倚孤標介然日者  
選自南宮掌綸西掖昇諸憲府授以人曹典謨訓誥之詞  
紀綱準繩之度施之必當僉曰汝能朕將寄以台階委之  
鼎鉉貞我庶績澄諸化源爾宜克念前修聿懷明哲體乾  
坤易簡之法廣日月無私之照使風化日厚澆浮自泯好

惡不競彝倫永清於戲予視以能乃升於位我心慎擇惟  
賢自求昔公孫宏以射策馳聲名光相府爾以掞天高稱  
亦踐臺司勉同素闕之風克副臯陶之舉仍加命秩用表  
新恩可朝散大夫尚書戶部侍郎同平章事勲封如故

委諸軍錄事參軍勾當義倉制

義倉之制其來日久近歲所在盜用沒入致使小有水旱  
生人坐委溝壑永言其弊職此之由宜令諸州錄事參軍  
專主勾當苟爲長吏迫制即許驛表上聞考滿之日戶部  
差官交割如無欠負與減一選如欠少者量加一選欠數

過多戶部奏聞節級科處

授費冠卿右拾遺制

前進士費冠卿常預計偕以文中第祿不及於榮養恨每積於永懷遂乃屏身邱園絕跡仕進守其至性十有五年峻節無虧清飈自遠夫旌孝行舉逸人所以厚風俗而敦名教也宜承高獎以做薄夫擢參近侍之榮載佇移忠之効可右拾遺

欽定全唐文卷六十五目錄

穆宗二

貶李道古循州司馬詔

誅流方士柳泌等詔

上皇太后尊號詔

京畿盜賊不在赦限詔

贈郭曖太傅詔

令內外官量抽陌錢詔

誕辰令百寮命婦入賀皇太后詔

淄青朝賀部領不得過五人詔

權停河北權鹽詔

宣慰盧龍軍詔

覆試鄭朗等詔

罰烏重裔等俸料詔

贈田布尚書右僕射詔

貶李景儉漳州刺史詔

禁乘驛官格外徵馬詔

停淄青兗鄆等道權鹽詔

賜田布葬錢詔

罰劉遵古俸料詔

流于方等詔

免江州逋賦詔

誅李宥諸子詔

禁要官密盛任京兆等官詔

禁百官臨祭出齋詔

令江淮諸州平糶詔

清理庶獄詔

定寒食假詔

遺詔

欽定全唐文卷六十五

穆宗二

貶李道古循州司馬詔

左金吾衛將軍兼御史大夫李道古幸以宗枝早參名級  
出分專面入踐通班誠宜祇慎周行恪居官次而乃利於  
苟進忘彼慎身持左道以事君將行險以僥倖因緣藥術  
薦達妄庸上惑先朝俯招物議跡其事狀合正刑章朕以  
臨御之初務在寬大特緩投荒之典俾從佐郡之名無謂  
優容而忽宏貸可守循州司馬

誅流方士柳泌等詔

山人柳泌輕懷左道上惑先朝罔求牧人貴欲疑衆自知  
虛誕仍更遁逃僧大通醫方不精藥術皆妄旣延禍釁俱  
是奸邪邦國固有常刑人神所宜共棄宜付京兆府決痛  
杖一頓處死翰林醫官董宏景程準山人李元戢田佐元  
並流嶺南

上皇太后尊號詔

朕光膺寶曆正位宸居大行皇帝貴妃尊冠六宮母臨萬  
國謹上尊號曰皇太后

京畿盜賊不在赦限詔

御樓勅下遠近已知如聞奸人覬望恩赦城外道路劫奪稍多從御樓勅下至來月五日以前京畿應有姦非盜賊等希恩故犯情不可原並依法處斷不在赦宥之限其犯罪人縱屬諸軍諸使亦委府縣依法科斷

贈郭曖太傅詔

追遠飾終先王令典況積仁累義事已顯於身前祥會慶傳福遂流於天下式光盛典爰舉徽章尊尊親親於是乎在皇太后父贈尚書左僕射曖克荷崇構有勞王家孝友

本於生知英華發於事任實修一德歷任三朝建中末年屬有大難畢力扈駕忘軀即戎忠貞之節國史明備才高望洽是膺沁水之祥德厚流光乃啟塗山之祚肆予小子獲纘大業未展言申之命敢緣褒紀之恩俾繼維師用光綽禮可贈太傅

令內外官量抽陌錢詔

比緣用兵歲久初息干戈百役所資國用多闕不可更加賦稅重擾疲人參酌權宜事貴通濟自今以後通內外支用錢宜於天下收兩稅鹽利榷酒稅茶及職掌人課料等

錢並每貫除舊墊陌外量抽五十文委本道本司本使據數逐季收計其諸道錢使差綱部送並付度支收等待一二年後國用稍充即依舊制其京百司俸料文官亦準別勅每月量抽修文宣王廟不可重有除減武官所給較薄亦不在抽取之限

誕辰令百寮命婦入賀皇太后詔

昔者聖王之法以孝理天下也廣愛敬之心推於四海盡奉養之志示於兆人然後自誠之化有情思感朕以眇身祇荷鴻業皇太后就安長樂朝夕承顏慈訓所加慶感兼

極伏以今月六日是朕載誕之辰奉迎皇太后於宮中上  
壽朕既獲申歡慰亦欲公卿大夫同之宜以今月六日平  
明於光順門集百寮及外命婦進名參賀皇太后朕御光  
順門內殿與百寮相見永爲常式

淄青朝賀部領不得過五人詔

淄青統押海蕃每年皆有朝賀比差部領人數較多寇盜  
既夷典章須守宜以後差此官正試相兼不得過五人

權停河北榷鹽詔

河朔初平人希德澤且務寬大使之獲安其河北榷鹽法

宜權停仍令度支與鎮冀魏博等道節度審酌商量如能約計課利錢數分付權鹽院亦任穩便

宣慰盧龍軍詔

劉總已極上台仍移重鎮兄弟子姪各授官榮大將賓寮亦宜超擢百姓復一年宜賜軍士錢百萬貫以內庫錢充仍令宣慰使給事中薛存慶親諭朝旨與節度使丞相張宏靖計會大將判官甄獎未及有父母在者並具名列上郡縣中有殘破甚者量便宜優恤管內年高憊獨廢疾不能自存者差官就問給賜粟帛

覆試鄭朗等詔

國家設文學之科本求才實苟容僥倖則異至公訪聞近日浮薄之徒扇爲朋黨謂之關節干擾主司每歲策名無不先定永言敗俗深用興懷鄭朗等昨令重試意在精覈藝能不於異書之中固求深僻題目貴令所試成就以觀學藝淺深孤竹管是祭天之樂出於周禮正經閱其呈試之文都似不知本事詞律鄙淺蕪累至多亦令宣示錢徽庶其深自懷愧誠宜盡棄以警將來但以四海無虞人心方泰用宏寬假式示殊恩特掩爾瑕庶明予志孔溫業趙

存約竇洵直所試粗通與及第盧公亮等十人並落下錢  
徽從別勅處分自今已後禮部舉人宜準開元二十五年  
勅及第訖所試雜文并策送中書門下詳覆

罰烏重裔等俸料詔

前刺史烏重裔等並位居守土職在牧人加稅縱緣軍須  
豈得不先聞奏遇赦雖當原宥亦合量有科懲烏重裔令  
狐楚魏義通等宜各罰三月俸料知州官釋放

贈田布尚書右僕射詔

故魏博節度使起復寧遠將軍檢校工部尚書兼魏州大

都督府長史御史大夫賜紫金魚袋田布朕以寡昧臨御  
萬邦威刑不能禁干紀之徒道化不能馴多僻之俗致使  
上公罹禍田氏銜冤爰整旅以徂征每終食而浩歎自茲  
弔伐驟歷寒暄雖良將銳師率皆協力而俟時觀釁未即  
齊驅嗟我誠臣結其哀憤引遷延之咎以自刻責奮洩烈  
之志以謝君親白刃置於肝心鴻毛論其生死忠臣孝子  
一舉兩全晉稱卞氏之門漢表尸鄉之節比方於布今古  
爲鄰況其臨命須臾處之不撓載形章表並深衷悃間使  
發緘悼心疾首從先臣於厚載爾則無愧覩遺像於麟閣

子何所堪端拱崇名職垂彝典據斯以報聊攄永懷可贈  
尚書右僕射

貶李景儉漳州刺史詔

丞相府署國家樞機上法三台下臨百辟若等威可紊則  
堂陛不嚴諫議大夫李景儉乃因酣醉輒肆叨瀆昏叟侮  
慢靡所不爲詢其狂態甚用驚聽宜加譴責以守遐荒予  
非深剋勉自循省可漳州刺史仍馳驛發遣

禁乘驛官格外徵馬詔

如聞官驛遞馬死損轉多欲令提舉所由悉又推注中使

郵驛稱不見券則隨所索盡供既無憑由豈有定數方將革弊貴在息詞自今已後中使乘遞如不見券及券外索馬所由輒不得供其常參官出使及諸道幕府軍將等所合乘遞並須依格式如有違越或分外科人夫並宜具名聞奏

停淄青兗鄆等道權鹽詔

兵革初寧亦資權筦閭閻重困則可蠲除如聞淄青兗鄆等道往來糶鹽價錢近取七十萬貫軍資給費優贍有餘自鹽鐵使收管以來軍府頓絕其利遂使經行陣者有停

糧之怨服隴畝者與加稅之嗟犯鹽禁者困鞭撻之刑理  
生業者乏蠶醬之具雖縣官受利而郡府益空俾人獲安  
寧我能節用其鹽鐵使先於淄青兗鄆等道管內置小鋪  
糶鹽巡院納榷起今年五月一日已後一切並停仍各委  
本道約校比來節度使自收管充軍府逐急用度及均減  
管內貧下百姓兩稅錢數至年終各具糶鹽所得錢並均  
減兩稅奏聞安邑解縣兩池舊置榷鹽使仍各別置院官

賜田布葬錢詔

田布頃因戎務發憤自裁言念忠誠豈忘贍卹宜賜錢一

千貫絹一千匹以充葬用

罰劉遵古俸料詔

遵古官守尹寺所寄非輕奏事之間先須撫實闕於詳審  
須示薄懲宜罰一月俸料

流于方等詔

于方罪犯合處極刑以其父頓頓在襄陽頗能幾諫不陷  
不義方實有之又念其弟季友嘗聯國姻特宜免死長流  
端州李賞流潮州郭元覽于啟明王昭以于方既從減論  
並放杖郭元覽配流封州于啟明配流新州王昭配流雷

州

免江州逋賦詔

江州所奏實爲懇誠若更抑爲必難務濟所訴逋欠宜令特放

誅李宥諸子詔

汴州逆賊李宥竊據城池坐邀符節率其兇黨敢拒王師今旣梟首於闕下宜令所司準式其男道源道樞道淪道安等叛逆之子固不可原理須正刑宜集衆處斬以左右神策兵各三百人防押即日行刑於京城之西市

禁要官密戚任京兆等官詔

廣德貞元再有勅旨要官密戚並不許任京兆判司畿令兩赤縣丞簿尉等緣人不遵行更資提舉自今已後切宜禁斷

禁百官臨祭出齋詔

郊廟之儀本乎恭恪罰輕生慢須議稍加自今已後有臨祭出齋者宜罰一月俸仍委監察使每具所罰官名銜聞奏

令江淮諸州平糶詔

如聞江淮諸州旱損頗甚所在米價不免踊貴眷言疲瘵  
須議優矜宜委淮南浙東宣歙江西福建等道觀察使各  
於當道有水旱處以常平義倉斛斗據時價減一半價出  
糶不得令豪家并糶使其必及貧人

清理庶獄詔

自冬以來甚少雨雪農耕方始災旱是虞慮有冤滯感傷  
和氣宜委御史臺大理寺及府縣長吏自錄囚徒仍速決  
遣除身犯罪應支證追呼近繫者一切並令放出須辨對  
者任其責保冀得克消沴氣延致休祥

定寒食假詔

寒食省墓著在令文其塋域在京畿者自今任寒食假內往來不限日數若在外州任準式年限請假

遺詔

朕以眇躬嗣守丕構雖勤求理道不敢荒寧而保慎或乖  
遘茲厲疾賴上元垂祐宗社降靈洎中外庶臣克輔寡德  
服餌頤養踰於周星而陽氣熇煩宿恙暴作頃刻之際至  
於彌留伊死生之理必有其分顧託有所予何恨焉皇太  
子湛睿哲溫恭孝友明敏自膺儲貳休德日新必能嗣於

耿光紹我先業宜令所司備禮於柩前即皇帝位咨爾卿士洎方伯連帥敬輔元子永綏萬邦宜叶乃心用底於道宜令門下侍郎平章事李逢吉攝冢宰諸道節度觀察防禦等使及諸州刺史守鎮任重戎旅事殷並不須赴哀易月之制宜遵舊典文武官等朝晡哭臨十五舉音山陵制度務從儉約無禁婚姻祭祀飲酒食肉其醫官等念其勤瘁亦可矜憐並不須加罪宜便釋放將相卿士中外臣寮送往事居無違朕意